

葉縣志總目

卷首

序文 目錄 纂修姓氏 凡例 圖考

卷之一

輿地志

沿革

星野

疆域

形勢附

山川

古蹟

卷之二

建置志

城池

街道附

廨宇

鋪舍附

倉廩

學校

觀附

坊表

關津

橋梁

寨堡附

廟壇

祠宇附

寺

卷之三

禮樂志

典禮

職祀

鄉約

總目

卷之四

賦役志

丁役里甲

田賦鹽法

雜稅附驛站

卷之五

職官志

各表

卷之六

選舉志

各表

卷之七

名宦志

卷之八

人物志

鄉賢書院

儒林藝術

文苑方外

孝義流寓

忠烈列女

卷之九

藝文志

賦

詩

頌

贊

記

序

墓志

銘

墓表

傳

書

事

論

考

祭文

卷之十

雜記

紀事
錄異

輯聞
辨疑

附錄

舊志凡例

舊志編次

舊志纂修姓氏

同知銜調署葉縣事中牟縣知縣歐陽霖重修

藝文志上

由來言藝文尚矣歷代以來詩賦詞章體分類別汗青

所載炳若日星而登眺紀勝發潛揚休亦時託諸聲律

作為紀傳要皆闡發古人義蘊因以自抒其風雅藻續

之思或奕世而傳為著蔡或同時而壽之山川豈特文

章足為世用哉良以千百年後欲見古人者親丰采於

簡牘中則登高能賦亦將感發而興起矣葉雖著作缺

如采而輯之幸存什一於千百未可謂之不幸也志藝

文第九

賦

問津臺賦

鮑訪

惟歲臨乎甲午余經蔡以遊陳見巋然之故臺沒路隅之
荒榛側聞夫子於此問津方太公迷殷遇文王伊尹迷莘
遇成湯何夫子之不遇處昏濁而遂亡永追想於遺跡遂
投弔於寒荒

昆陽城賦

木蘇軾

淡平堊之霏霽忽孤城之如塊風吹沙以蒼莽悵樓櫓之
安在橫門豁以四達故道宛其未改彼野人之何知方疆

僂而畦菜嗟夫昆陽之戰屠百萬於斯須曠千古而一快
想尋邑之來陳兀若驅雲而擁海猛夫扶轅以蒙茸虎豹
雜沓而橫潰罄天下於一戰謂此舉之不再方其乞降而
未獲固已變色而驚悔忽于騎之突出犯初鋒於未艾始
憑軾而大笑旋棄鼓而投械紛紛藉藉死於溝壑者不知
幾何人或金章而玉佩彼狂童之僭竊蓋已旋踵而將敗
豈豪傑之能得盡市井之無賴貢符獻瑞一朝而成羣兮
紛紛就死其何怪獨悲傷於巖生懷長才而自浼豈不知
其必喪獨徘徊其安待過故城而一弔感志士之永慨

甘澍賦

弁引

明提學

李

棻

內鄉人

萬厯己亥自夏仲厯季不雨百姓惶惶葉侯馮未庵惻然憂之齋沐拜禱靡神弗周謂父老曰往者二十四年旱蝗禱河山龍井應焉盍修前事遂率士民徹蓋徒跣十步一拜僕僕赤日中勞倍往昔四境見者聞者感且泣下禱畢輕雷微雨隨侯以歸衆見有白蛇三尺許從南來皆闕然驚視蛇避衆潛窺之蛇乃出昂首蜿蜒入井中起視瓶水溢出頃之大雨竟日夜四境霑足境外無兩父老士女以手加額曰茲侯膏澤我而粒我也吾屬老且死未有見憂民如我侯者蓋自仁會禱雨而百姓興歌圖澄感天而白龍降宇今侯得之矣子

野閭侯美政多端復因葉父老之請乃不辭蕪陋作甘
澍賦爲侯頌焉

賢皇穹屆茲徂暑兮氣忻忻而蘊隆陽驕亢以弗降兮陰
塞閉而爲蒙俯山川之修阻兮悼嘉穀之盡萎羞屏翳之
弗職兮蹇雲駐而罔功羌祝融扇此鬱燠兮原隰燬而升
煙星火熾茲炎氛兮揚芒燿而降天晝冀帝以抉日兮夜
仰雲漢之昭然田畯倚耒長太息農人束手而涕漣雲油
油露且霑兮恍皇澤之降滋忽頽颺翕復習兮掃雷霆而
電馳紛妖魅爲此崇兮焚巫庭平糞益星符虛而罔應兮
月離畢而愆期荷仁侯哀此下民兮恒憂心之如熏軫予

遺其無所兮潔精誠而孔殷盡祠壇靡愛牲璧兮感寥寥
弗一驗繼復禱於龍井兮祈虔一而罔分甯有事於靈星
兮焉用禱乎木仙胡羨養於神池兮安陽石之可鞭擬桑
林之芳躅兮暴赤日以徹蓋計步十而一匍匐兮誓禺中
而請代竭勤閔如煖焚兮焉能含水與醜酒冀皇眷之過
回兮庶吾民之有賴禮嶠嶢嶮嶮之石穴兮冥且淵如儼
風雷隱隱深藏兮神龍之居旁穿空洞無底極兮潛叵測
也甫陳詞控祝登拜兮輕雷隨車俄白螭自南以升岷兮
宛翹首而若馴填避復回以入井兮光皚皚以射人稽古
溢口之臨詣兮感白龍以降神造天井以遺告兮繞巨虬

於壇壝茲維皇效此特異兮揆往跡而弗爽忽瓶水之津
津兮神貺丕顯而奚疑埒黑蜨躍於立泉兮陋蜥蜴之頻
呼誦浦肅設於防帟兮卽石牛乎焉塗迓玄冥之忽駕靈
馭兮鞭風雷於四陲氣滄霤以黥黥兮聲瀟灑而淋漓漸
霏霏以霧霈兮竟日夜而霑濡灑豐浸於中疇兮欣靈雨
之既零我禾黍之與與兮輸公私而俱盈顧四郊以稱足
兮詢境外則獨無天靡高而弗格兮誠隨至而皆孚辭曰
雖帝力兮侯之錫蘇我民兮侯之績我侯來兮百廢興百
廢興兮善政成感神明兮三異徵三異徵兮民更生仁我
民兮著芳聲芳聲著兮達神京能久藉兮入台衡爲霖天

下兮泰階平維侯恩兮維永存分勒貞璠兮終不可諼兮

憤樂亭賦

國朝 王 繡 邑人

湯湯滢水峩峩黃山鳧飛北闕龍騰南天溺車溪下曬書
臺前趨耕往矣狂歌猶傳此固名人託跡之區而亦素王
過化之間大哉聖乎其言如綸慮于高之惑惑獨畢生之
精勤甫田可反而邾步往簪乃得其持循進憤生樂其樂
自真諒普天所奉爲著祭而吾葉尤宜寶爲書紳者也爾
乃步賢關披聖幄數禮器訪遺學弔軌跡之淹蹇緬聖謨
之廣博嘉惠後人大道攸託建新亭以命名恍提命之如
昨觀斯亭之聳峙居泮水之中央檐牙共紫極頰影節節

並黃道呈祥浮梁咽之波虛幽遠蟠之光鉅鱗遊
泳於廡下芹藻出沒於砌旁萬種花樓城而掩映一曲欄
倚岸以徜徉擬因濱以澡德比舞等以適狂洵上達之佳
景信陶涿之有方他若丹臺魏表崇門洞徹董路前臨殿
宇高揭檜柏鬱蒼廓廓幽折鏡尊濟濟鼓烈烈近聖居
而著斯款大觀之廣迤至於文星聯瑞於東閣奎壁照耀
於南樓雲路高高而可攀雉堞坦坦而堪遊覽煙火於萬
家望村落於一草水流通帶亂山連群綿陌平鋪茂林環
周卽四眺之岡遠歲斯亭之帶幽由亭以往則有圖書之
府著作之庭房藏百史庫貯九經五章都載十緹充樞縵

襄相映玉殿金臺甘山紫泥之子翠鳥蘭采之英赤虹玉
尺之飛朱雀雲霞之精乃有闕英遺才清都彤史龍翰鳳
雛之傑蘭薰白雪之工重不珥筆來遊巾車至止探伊洛
之淵源運尼山之宗旨編珠珞以鑿書裁瑤玕而印紙摺
文則金石九章詠詩則笙簧四始既游衍於六藝亦縱橫
於八體廣寤寐之無數乃感憤而興起於爲十載閉戶三
年下帙錢硯自勵圓木自規過鍾扇而可捐懸空梁而刺
雖既窮幽而入奧乃融融焉覺聖賢之趨步可追是以聞
望卓然詞壇共推扶風留尙書之臺文通遺漂麥之微彼
月露與風雲縱綠情綺麗而未窺乎至道之藩籬當夫旭

日方遲惠風微扇黃鳥睨曉豐草綿芊我公臨莅園橋聽
觀藝習矍圃之文禮講樹下之篇我公於是穆然深思擊
然高望曰旨哉亭乎是大聖人之所馮式也不可無歌以
紀其末顛於是拜手而爲之歌歌曰望宮牆兮大無門顧
名義兮功維勤深景行兮矢勿讓樂陶陶兮澤華新

詩

登葉故城謁沈諸梁廟

隋李百藥

總轡臨秋原登城望寒日煙霞共掩映林野俱蕭索楚塞
鬱不窮吳山高漸出客行殊未已沐浴期終吉椒桂奠芳
樽風雲下虛室館宇肅而靜心神康性逸伊我非真龍勿

驚疲朽質

寄汝墳從弟楚材時郊將入秦楚材適楚

唐孟郊

朝爲主人心夕作行路吟
汝水忽淒咽汝風流若音北闕
秦門高南路楚石深分淚灑白日離腸繞青岑
何以寄遠懷黃鶴能相尋

城西訪友人別墅

雍陶

澧水橋邊小路斜日高猶未到君家村
園門巷多相似處
處春風枳殼花

汝墳別業

失路農爲業移家到汝墳獨愁常廢卷多病久離羣鳥雀
垂窗柳虹霓出澗雲山中無外事樵唱有誰聞

聞丹邱子於城西營石門幽居中有高鳳遺跡僕雖
羣遠懷亦有棲遁之志因序舊以寄之

李 白

春華滄江月秋色碧海雲離居盈寒暑對此常思君思君
楚水南望君淮山北夢魂雖飛來會面不可得疇昔在嵩
陽同衾卧羲皇綠蘿笑簪紱丹竈賤巖廊晚途各分析乘
興任所適僕在鴈門關君爲峩眉客心懸萬里外影滯兩
鄉隔長劍復歸來相逢洛陽陌陌上何喧喧都令心意煩

迷津覺路失託勢隨風翻以茲謝朝列長嘯歸故園故園
恣閒遊求古散縹帙久欲入名山婚娶殊未畢人生信多
故世事豈惟一念此憂如焚悵然若有失聞君卧石門宿
昔契彌敦方從桂樹隱不羨桃花源高風起遐曠幽人跡
復存松風清瑤瑟溪月湛芳樽安居偶佳賞丹心期此論

鄴中王大勸入高鳳石門山幽居 李白

一身竟無託遠與孤蓬征千里失所依復將落葉弁中途
偶良朋問我將何行欲獻濟時策此心誰見明君子制六
合海塞無交兵壯士伏草間沈憂亂縱橫飄飄不得意非
發南郡城紫燕檐上嘶青萍匣中鳴投軀寄天下長嘯發

豪英恥學瑯邪人
龍蟠亭躬耕富貴
吾自取建功及春榮
我願執爾手爾方達
我情相知同一己
豈惟弟與兄抱子
弄白雲琴歌發清聲
臨別意難盡依稀存
令名

尋高鳳石門山中元丹邱

李白

尋幽無前期乘興不覺遠
蒼崖渺難涉白日忽欲晚
未窮三四山已歷千萬轉
寂寂聞猿愁行行見雲收
高松來好月空谷宜清秋
溪深古雪在石斷寒泉流
峰巒秀中天登眺不可盡
丹邱遙相呼願我忽而哂
遂造幽谷間始知靜者閒
留歡達永夜清曉方言還

行至汝墳寄盧徵君

孟浩然

行乏憇余駕依然見汝墳洛川方罷言嵩嶂有殘雲曳曳
半空裏明明五色分聊題一時興因寄盧徵君

行次葉縣

宋
歐陽修

朝渡汝河流暮宿楚山曲城陰日下寒
埜氣春深綠征車倦長道故園有喬木
行行漸樂郊東風滿平陸

題雙鳧觀

蘇轍

王喬古仙子時出觀人寧嘗爲漢郎吏厭世去無還雙鳧
仙爲戲聊以驚世頑不然神仙跡羅網安能攀紛紛塵埃
中銅印紆青綸安知無隱者竊笑彼愚妄茲

初至葉縣

國朝元
年作

葉縣

黃庭堅

白鶴去尋王子晉真龍得慕沈諸梁十年往事如飛鳥
日傾愁對夕陽遺老能名唐郡邑斷碑猶是晉文章浮雲
不作包桑計只有荒山意緒長

將歸葉先寄明復季常

熙甯二年
葉縣作

黃庭堅

初日照屋山好鳥哢簷角卷簾吏却掃齋舍寒蕭索呼兒
笏春醪期與夫子酌簡書驅我出衝雪凍兩脚莫行星輝
輝曉起雞喔喔青煙過空村商旅無遠橐豈不欲少留王
事苦敦薄平生白眼人今日折腰諾可憐五斗米奪我一
溪樂公等何逍遙睥睨寄講學談犀振清風暮局落秋雹
雲陰愁鴻濛山路險犖确慎無告歸軒使我數日惡羸驂

逆歸心旋海蹶霜灤悲嘶惜障泥短筵冷難提南征喜氣
動迎面蛛絲落買網鱸金橙歸償炊黍約

次韻裴仲謀同年

熙寧二年
葉縣作

黃庭堅

交蓋春風汝水邊客牀相對卧僧瓊舞陽去葉纔百里時

謀尉
舞陽賤子與公俱少年白髮齊生如有種青山好去坐無

錢煙沙篁竹江南岸輸與鷓鴣取次眠

春祀分得葉公廟雙鳧觀

黃庭堅

春將祠事出門扉宮殿參差繚翠微清曉風煙迷部曲小
蹊桃杏掛冠衣葉公在昔真龍去王令何時白鶴歸糟魄
相傳漫青史獨懷千古對容徽

題雙鳧觀

黃庭堅

飄蕭閱世等虛舟，歎惜眼前無此流。
滿地悲風盤翠竹，半巖寒日破紅榴。
青山不逐帝朝改，白鶴歸來宮殿秋。
王令平生尊酒地，十年萬歲想來游。

登南禪寺懷裴仲謀

黃庭堅

茅亭風入葛衣輕，坐見山河表裏清。
歸燕略無三月事，殘蟬猶占一枝鳴。
天高秋樹葉公邑，日暮碧雲樊相城。
別後寄詩能慰我，似逃空谷聽人聲。

同孫不愚過昆陽

黃庭堅

田園恰恰值春忙，驅馬悠悠昆水陽。
古廟藤蘿穿戶牖，斷

碑風雨碎文章真人寂寞神爲社
堅壘天蛇女採桑拂帽
村帘誇好酒爲君聊解一瓢嘗

漫尉

弁序 既審
三年葉縣作

黃庭堅

庭堅讀漫叟文愛其不從於役而人性物理齎然詣於
根理因戲作漫尉一篇簡舞陽尉裴仲謀兼寄贈郝希
孟胡深夫二同年爲我相與和而張之尙使來者知居
厚爲寡悔之府然知我罪我皆在此詩

豫章黃魯直既拙又狂癡往在江湖南漁樵乃其師腰斧
入白雲揮車棹清溪虎豹不亂行鷗鳥相與嬉遇人不崖
巽順物無瑕疵不知愛故厭不悔爲人欺晨朝常漫出暮

夜亦漫歸漫尉葉公城漫撫病餘藜不篡非已事不趨非
吾時人罵狂癡拙魯直更喜之或請陳漫尉壽尉蒲萄卮
酒行激懦氣攘袂起峭規君子守一官烏肯苟簡爲奈何
如秋葭信狂風離披漫行恐污德漫止將敗機漫默買猜
謗漫言來詬譏漫尉謝答客願客深長思漫行無軌躅漫
止無馬鞵漫默怨者寡漫言知者希吾生漫叟後不券與
之齊於戲獨如子因使目爲眉強顏不計返乾坤一醯雞
崑崙視糟坭旣化不自知悔吝雖萬塗直道甚坦夷覆轍
索孤竹奔車求仲尼以旌招虞人賤者不肯尸玉潤安可
涸日光安可緇斯言出繫表當以罔象窺賦分自有然那

用時世移吾漫誠難改盡醉不敢辭

按田

弁序 熙寧四年葉縣作

黃庭堅

余與晁端國斯道奉檄按馬鞍山東港河稻田陂官丁
誤引道左次水澤山深徑危泥潦堅冰長幹挾馬僅可
以渡行五十里遂不容馬步沮洳虎跡新往來烏鳥叢
噪荆榛盡日出入乃至河上集近山之農告以獻利者
皆以爲瀕水爲今居旁治新田果菰有畦桑棗成行自
山之東西皆不可爲陂港河原出四頭山支分爲三其
一盡南出少折而東入舞陽其一稍西流又折而北入
石塘河其一卷河也出山而東流卒與二水合而入汝

河汝河今漕河也吾二人既臨河具知獻利者之狀而
余獨有感焉頃歲肉食者以羌胡爲憂師老西鄙而士
大夫知與不知爭道孫吳覆軍殺將開虜之輕量中國
心而富貴者今日比肩近者朝言多在民事欲化西北
之麥隴皆爲東南之稻田良吏攘臂起郡有召信臣縣
有史起矣夫土性者自先王所不能齊而一切不問薈
夫故苗灌爲新田茫茫水陂邱壟平盡其君子威以法
刑其小人毒以鞭朴有舉斯有功有功斯有賞作者之
議曰前日吏持印相授以媮眼前而厚利棄於蒼煙野
草之間是豈不可笑以余觀之恐是非特未定也觀朝

廷之意初不責必成奉承者必有功遂失之耳語曰
事傳二人輒失其真詩曰周爰咨謀蓋使指也今也咨
謀者不慘怛以告者未忠信歟夫聽言之道必以事觀
之奪民之故習而強以所未嘗其利安在興利者受實
賞力田者受實弊郡縣行空文朝廷收虛名名爲利民
其實害之議者謂之有意於民乎吾不知也以爲有功
於民乎今旣若是矣予既有是言思道屢歎而已是日
所至已遠不能歸遂宿水濱民家北風黃草破屋見
月與晁五引酒相酌忽然已醉不知跋涉之勞也

詩強思道和之

河冰積崢嶸山雪晴索寞幽齋怯寒威況復出城郭馬爲
蝟毛縮人歎狐裘薄淤泥虎跡交叢舍烏聲樂橋經野燒
斷岸值天風落洩雲迷鴻濛戴石瘦犖嶷攀援若登天扶
服如入橐窮幽至河麋落日更槃礴新民數十家飄寓初
棲託壯產無情農荒榛盡開鑿臨流遣官丁悉使呼老弱
恩言論官意障水陂可作春秋百頃秔秋報千倉獲掉頭
笑應儂吾麥自不惡麥苗不爲稻誠恐非民瘼不知肉食
者何必苦改作我行疲鞍馬且用休羈絡艱難相顧歎共
道折腰錯勢窮不得已來自取束縛月明夜蕭蕭解衣寬
帶索卧看雲行天北斗掛屋角析薪爨酒鼎興至且相酌

曉起臨汝

黃庭堅

缺月欲崢嶸，鳴雞有期信。征人催夙駕，客夢未渠盡。野荒多斷橋，河凍無裂壘。羸馬踏冰翻，疑狐觸林遁。清風蕩初日，喬木囀幽韻。崧高忽在眼，岌我臨數郡。元雲默垂空，意有萬里潤。寒暗不成雨，卷懷就膚寸。觀象思古人，動靜配天運。物來斯一時，無得乃至順。涼暄但循環，用舍誰喜愠。安得忘言者，與講齊物論。

衝雪過新寨忽忽不樂

熙甯四年
葉縣作

黃庭堅

縣北縣南何日了，又來新寨解征鞍。山銜斗柄三星沒，雪共月明千里寒。小吏有時須束帶，故人頻問不林官。丁

長盡梢雲竹歸及春風斬釣竿

垂虹詩話云山谷別葉縣日作新寨詩有俗學近知

回首晚病身全覺折腰難之句傳至都半山老人見之擊節稱歎謂黃某清才非奔走俗吏遂除北都教授又舊本云一夢江南據馬鞍夢中投宿夜闌千山銜斗柄三星沒雪共月明千里寒俗學近知回首晚病身全覺折腰難江南長盡梢雲竹歸及春風斬釣竿今集中前六句皆不同

還家呈伯氏

熙寧四年葉縣還家作

黃庭堅

去日櫻桃初破花歸來着子如紅豆四時驅迫少須臾兩

鬢飄零成老醜永懷徃在江南日原上急難風雨後私田

苦薄王稅多諸弟號寒諸妹瘦扶將白髮渡江來吾二人

如左右手苟從祿仕我還回且慰家貧兄孝友強趨手板

汝陽城更責愆期被訶詬法官毒螫草自搖丞相霜威人

避走賤貧孤遠蓋如此此事端於我何有一囊粟麥七十
錢五人兄弟二十口官如元亮且折腰心似次山羞曲肘
北窗書冊久不開筐篋黃塵生鏤鈕何當略得共討論況
迺雍容把杯酒意氣敷腴貴壯年不早計之且衰朽安得
短船萬里隨江風養魚去作陶朱公斑衣奉親伯與儂四
方上下相依從用舍由人不由已迺是伏轅駒犢耳

途次葉縣觀千葉桃花

朱欽順
二州守陶弼

三月宮桃滿上林一花千葉費春心
葉公城外灤河北一樹無人色更深

山下溪流照城郭幽亭柏子風自落古壇蒼蘚少人行不
見雙鳧見黃鶴

葉縣

胡曾

葉公邱墓已塵埃雲蠹崇垣亦半摧借問往年龍見日幾
多風雨送將來

昆陽

胡曾

師克由來在協和蕭王兵馬固無多自從大敵昆陽後却
笑前朝散楚歌

將次葉縣道中

參知
政事陳與義

涪人
遷葉

荒野少人跡竹輿伊軋聲晴雲秋更白野水暮還明寂寞

信吾道淹留諳物情王喬有遺鳥借我一長征

葉縣清和卽事

金葉
縣令劉從益

潭源人

一度清風了一年溫風嫋嫋雨斑斑幾家繡幃尋芳去何處蹇驢馱醉還宿草新墳驚世短落花落流水占春閒晚鶯啼破松窗夢缺月東來挂屋山

宛邱歎

有引

左司員
外郎元好問

太原人

劉雲卿御史宰葉除逃戶稅三萬斛百姓爲之立碑頌德髯李令南陽配流民以牛頭租迫而逃者萬餘家賢不肖用心相遠如此李之後十年予爲此縣大爲逋懸

李皆家宛邱故以宛邱歎命篇

秦陽陂頭人遼絕蒺花茫茫白於雪當年萬家河朔來盡
出牛頭入租帖蒼髯長官錯料事下考大笑陽城拙至今
三老背腫青死爲逋懸出膏血君不見劉君宰葉海內稱
飢摩寒拊哀孤惇碑前千人萬人泣父老夢見如平生冰
霜紉絳渠有策如我碌碌當何成荒田滿野人得耕詔書
已復二年征早晚林間見雞犬一犁春雨麥青青

方城道中懷山居

元好問

技拙違時用年饑與食謀江山貧十歎日月賈人留楚客
頻招隱夕園故倦游衡門有幽事還我北窗幽

葉縣雨中

元好問

春旱連延入麥秋今朝一雨散千憂龍公有力迴枯槁客
子何心歎滯留多稼卽看連楚澤歸雲應亦到嵩邱兵塵
浩蕩乾坤滿未厭明河拂地流

昆陽

元好問

古木荒煙集暮鴉高城落日隱悲笳并州倦客初投跡楚
澤寒梅又過花滿眼旌旗驚世路閉門風雪羨山家忘憂
只有清樽在暫爲紅塵拂鬢華

去日黃花半未開南來忽復見寒梅淹留歲月無餘物料
埋塵埃有此杯老馬長途良憊矣白鷗春水亦皎然商餘

說有滄州趣早晚乾坤入釣臺

昆陽懷古

學士王磐

行役宛洛間路入昆陽城潢水抱城左蕩漾東南溟川源
入四顧盤互多岡陵城頽削懸崖草深惡鴟鳴嗟爾一坏
土當此百萬兵莽圖十九年聚此天爲坑王者况不死干
騎驚龍騰漢業兆豐沛赤符此中興創復兩不易山川賁
雄名東南遙相望盤盤兩神京千年事雲散草木合威靈
野人無所知城邊事春耕扶犁上廢壘隴畝縱復橫只應
懷古士千載愴餘情

王喬洞

張仲壽

聞說王喬洞遊觀樂我情松蟠巖谷靜竹隱野泉清遺斧
碑存記看碁石有枰青山飛白鶴千古爛柯名

遊河山寺

葉縣
主簿黃居中

馬蹄踏月到河山鞭撻租庸入吏班坐席未温還又去朝
來甘換衲衣閒

雙鳧觀

明左布
政使李昌祺 廬陵人

王子飛鳧處仙遙跡尙存城荒生暮靄殿古鎖秋雲壞壁
燈煙暗閣階草氣薰古今爲縣者神異獨稱君

輓焦侍郎宏

少保兵
部尙書于謙 錢塘人

廿年湖海舊相知功業才華衆所推公暇省中同宴笑朝

回馬上共追隨可憐乘傳還家後無復停車待漏時薄奠
一杯情莫盡臨風惟有淚雙垂

題葉縣學

巡撫都御史楊璿無錫人

南陽佳勝屬昆陽瞻仰黉宮更倍常泮水綠搖芹葉長石
壇紅落杏花香書聲詠日時時趣文燄冲天夜夜光傳語
青衿須記取由來達者得升堂

問津渡

按察司僉事吳伯通廣安人

無邊道路有通津舉世茫茫獨愴神上國不來三聘召中
途聊問耦耕人山川曾識周遊面沮溺焉知大造仁餽
四方憐我輩臨流空歎負君民

過問津里

巡按 御史顏鯨 鄞縣人

平沙細柳遶城闔里社猶傳古問津鳥獸不羣沮溺誤風
衰何用楚狂嗔農蓑帶雨鋤新曉使節觀風入暮春野水
方舟堪利涉憑誰寄與耦耕人

古葉縣志感

顏鯨

遠來近悅是何年長爲憂民間墾田凡厥有生皆赤子願
言無罪對青天閭閻機杼投空壁山徑樵薪漫冽泉問道
南陽朱季子慙慙遺念及顛連

問津圖

大學士 李東陽 茶陵人

周道失其砥多歧正紛紜皇皇乘極意輟轍何殷勤迷路

失楚蔡傳車問耕耨問泥漚不計問海濶不云乃非馬
辨上可凌高雲遂令仲由勇逸氣摧二軍夫子憮然歎彼
狂竟不聞豈知聖人志一飯不忘君夙抱物我與鳥獸非
吾羣甯同辟世士高舉懷清芬時哉聖不偶萬古遺斯文
彼耕獨何爲幸免汗塵氛嗟嗟功名輩耽嗜成酣醺吾官
亦素餐愧此心如焚惟賢古希聖老大窮朝曛吾津在洙
泗敢謂茫無垠

葉縣懷古

余徽

白馬盟寒左袒空憤持黃鉞走羣雄從容一展安劉志談
笑全收復漢功威壓寇魂潛壤下喜回王氣接關中至今

古葉山頭路猶有當年積甲蹤

霸王城

余 徽

灑水之東灑水陽傍有一城名霸王霸王已矣城已廢空
餘草樹參天長惜昔霸王圍漢日暗鳴咤叱真無敵笑談
坐擁諸侯兵蓋世之氣拔山力城上曾駐旌旗紅側目愁
殺龍準翁自非當時紀信力甯克脫身虎口中可憐時往
騅不逝亞父既去龍且死玉帳佳人淚漫流烏江亭上船
空艤五年霸業煙塵飛七十餘戰空爾爲甘心一就垓下
勿無面重向江東歸往事茫茫已如許過眼英雄安足數

城上放歌學楚聲落木蕭蕭響風雨

過昆陽城懷古

禮部 尚書 孫承恩

昆陽城頭秋日淒
昆陽城下沙塵飛
風煙蒼茫鳥不度
黃狐白狐向我啼
當年炎祚遭中否
鬼魅因之盜神器
世厭王田僞
并行天教白水真人起
想當尋邑驅兵來
百萬氣燄如風雷
虎豹咆哮助威猛
已視漢種如灰埃
小怯大勇吁可異
殺氣殷殷動天地
前徒倒戈勢若崩
百萬雄師一時潰
堂堂大義聲四馳
天意所向誰能支
炎精再噓復故物
祀漢配帝崇不基
世往江山尚如故
城堞周遭宛樓櫓
撫事弔古增慨傷
高情獨有坡翁賦
嚴尤小豎非英才
失身篡逆何爲哉
留芳不能乃遺臭
千年唾罵誰爲哀
代遠

已無冤鬼哭野老時時得遺鏃我來無暇訊從容想像猶
然愴心目只今海宇當清甯閭不聞刁斗臨乾坤帝力
爾不識但樂犁鋤歌太平

問津渡

南太
常卿牛 鳳 邑人

世人春秋姬運頹素王何事此徘徊葉郊野渡停車馬滄
水荒途迷草萊沮溺高宗惟耒耜丈人故趾亦塵埃空餘
汨汨朝宗水誰復臨津一問哉

玩龍臺

牛 鳳

神物由來詎易求子高何事得同游漫傳窺牖驚千載爭
似騰天潤九州漠漠荒臺淹歲月茫茫幻語播吟謳水官

失職無從問安得司空却姓劉

王喬墓

牛鳳

鴈鷖鳧鳥入青雲太史遙觀知異氛不見郎官朝聖主止
將雙鳥達明君昭昭汗簡傳今古渺渺荒墳對夕曛漢代
諸陵非故土玉棺何在語空聞

石門山

牛鳳

涓涓昆水發西唐曾是文通闕德鄉暑雨忽飄曝麥散涼
颺徐遞誦聲長高風流播山川在信史光昭姓字香猶有
居民談古跡荒墳何處草茫茫

諸葛故址

牛鳳

峰頭高望兩南陽，遵養當年寓此邦。
山麓斷幢題姓字，道周荒草沒行藏。
臥龍一去風雲散，梁父重吟感慨長。
墟畔至今存古廟，衣冠猶侍漢中王。

歐陽里

牛 鳳

周道傍邊水濫觴，高名久矣屬歐陽。
不知何代開新墅，共說灣頭是故莊。
戚里人隨秋雁遠，洪陂波與曉天長。
遙憐畫舫青春日，一派笙歌出洞房。

講武臺

牛 鳳

君王遊行耀華彝，鞠旅陳兵澠水湄。
殺氣夜衝星斗暗，陣雲晨壓曙光遲。
龍車鳳輦招搖日，北狩南蒐凱奏時。
十載

遺踪歸阿武

世傳武則天講武於此

誰知顯慶是男兒

澧水橋

牛風

方城北望有通津
橫跨修梁不計春
冉冉虹霓疑卧水
堂堂河伯儼垂紳
雪天緩步還堪畫
月夜長吟更絕倫
濯足濯纓淹過客
觀瀾觀逝屬高人

牛太僕西唐

浙江右布政使王尙綱
郊縣人

大僕宛葉豪十年秉衡鑑良璧
啟琢追精金出鍛鍊漂麥
訝前聞探環徵慧見嵩遊氣已雄
巢由或立傳

昆陽報

王尙綱

使節衝霄發雲飛過上官一函馬前詔不敢問悲歡

過王喬祠

河北呂邦耀錦衣衛人

欲識郎官謁紫鸞但看雙鳥舞雲端王喬自有真消息蹤跡何須辨玉棺

輓許烈女

邑令馮日望慈谿人

謾言花燭影搖紅一醮盟心事已終素練不妨隨壻訣青鸞肯復向誰容人傳朗節乾坤老名徹幽潛草木榮假使丈夫皆若女睢陽柴市笑談中

過長沮桀溺耦耕處

國朝刑部王士正新城人

曾讀陶公傳遼遼沮溺耦耕餘故跡流水抱寒岑鳥下日將夕雲歸山半陰從來避世者不厭入林深

蕭條澧水暮煙封古殿青苔上廢鐘地下子高應一笑世間誰解好真龍

問津渡

進士

呂

潛

遂寧人

黃成山色近沙白岸如銀策馬尋遺廟臨流思古人高風田舍渺轍跡道塗澹何事歸耕叟猶驚宛洛塵

王喬墓

呂潛

既負神仙術胡爲玩世來漢庭崇幻吏昆水重墳臺夕日照黃土殘碑覆紫苔有懷二善績卓爾聖門才

五龍廟渡沙河之葉

分守汝南道

戴明說

滄州人

殿間崩崖仄攀藤聽古河石飛駭馬馭橋斷放龍過湖海
包茅隔乾坤盜賊多韃靼何日戢羽扇散征駝

登葉縣城樓

戴明說

薄暮憑孤堞晴陰變漢蹤傳龍飛大澤有烏障層峰束楚
迂還日屯牛逼老農古津不可問流繪欲馳封

謁光武廟

裕州陸可求 山陽人

昆陽木拔道始通光武徒步攜英雄當年盛業留香火遺
像於今祀故宮陰風夜颯鬼神哭靈氣晝靄龍蛇伏幾回
松檜吹雪濤空山六月寒侵屋我來瞻拜神愴然俯仰懷

商何邦全漢室威義久已矣千秋遺蹟期相傳

葉縣作

宋 至
人

昭王愛馬終得馬葉公好龍却畏龍世事大都如此耳君
不見藥鑄之鼎陞離光怪聲價高鐘鏞

輓劉將軍

福建督
學道 孫期昌 邑人

悵望西陵樹影斜仙遊何處坐雲車馬留舊苑嘶紅日劍
掛荒城隱紫旄采石無人爭畫戟夜臺有夢鎖流沙空餘
郭外麒麟冢日落孤墳啼暮鴉

輓段孝烈

歲貢
馬奪錦 邑人

知有親身不有身昆陽少婦植天倫玉肌濺血丹霄迴金
槃調糜湛露新共道名閨生瑞草實關至治產神麟漫譚

忠孝鬚眉壯撐柱坤元賴帨巾

昆陽懷古

邑今

呂柳文

遂甯人

垓下一戰帝業成昆陽一戰帝業始項羽八千散楚歌
盡邑百萬填潢水大勇小怯見真人鬱葱紫氣歸遐邇奕葉
中興十二傳宮闕燦煌開帝里操莽後先蓄志同可憐炎
祚移奸雄洛陽陵廟成焦土蕭王城郭黃埃封世上棋局
幾變改祠前獨剩漢時松松頂高盤白項烏夜號明月曉

啼風

石門高鳳讀書處

呂柳文

一來遊策馬陟崇岡石門山百轉昆水流湯湯伊人讀書處巖阿木干章漂麥存遺址麋鹿遊其傍流連日西頽野人具壺觴追隨非爾事辛勤事農桑

昆陽八景歌

呂柳文

問津渡口水淙淙停車曾歎道難容今猶萬派盡朝宗玩龍龍現畏真龍龍亦含笑返蒼穹諸葛遺墟委杉松石壇晻靄寒雲封澧水長橋臥玉虹曉霞倒映玻璃紅王喬戀闕朝九重雙鳧時趁五更風講臺傳經漢馬融閩武人誤女從戎嗟彼蛾眉飾冶容誰云狐媚總罷熊歐陽第宅草莽茸不見香塵車馬踪沙塵黯淡春花中石門嘉遯俯幽

宮千年踪跡誰與同琴歌無聲鶴唳空

昆陽行

卓爾堪

昆陽距孔道往古多戰爭前季流寇來殺掠幾空城汝水
流人膏街衢狐狸行迄今五十年有司徒經營版圖稀戶
口荒田少人耕豈不供賦役秋風吹哭聲呂侯謂邑侯呂公柳文
握符至勤懇濟蒼生三載事招徠遠近稱神明他爛荷鋤
者願為昆陽氓

昆陽懷古

鄧勗采吳門人

誰能移漢鼎文叔掃欃槍白水明星宿青山逐虎狼鶯啼
迷古戍柳色蔽橫塘我自南陽裔低徊認故鄉

登陟探形勢昆陽在城中山城喧舊夷野老言還官廡刑

多仙蹟人煙雜土風招徠纔五載比戶啟簾櫳

時邑侯呂公有善政

昆陽道上

泌陽雷

珽井研人

風塵人去幾經秋又拂煙霞問舊遊叢棘昔猶驚伏虎佩
刀今已鬻耕牛林陰遠帶山雲碧鴻影閒隨澗水浮自是
神仙飛鳥處行來疑近鳳麟洲

翫龍臺

連山李來章襄城人

雜樹蒼然土一堆黃冠向我指殘臺雲寒無復天龍下秋
晚惟逢塞雁來自古噉名多被誤於今閱歲轉興哀徘徊
廢院金風落夕照蒼茫冷碧苔

劉將軍祠

廩生

王九錫 邑人

莫將興廢問乾坤報國身捐虎豹屯四壁青山埋豪氣一
城遺命戴深恩道旁草染孤臣血野外風飄大將魂五十
餘年崇祀在白頭父老黯聲吞

許烈女墓

王九錫

孤墳寂寂古城邊薄命憐歸黯澹天一死盟心全大節千
秋烈骨闕重泉斷雲冷月芳魂杳碧草青山遺恨懸賴得
賢侯重表建使人含淚憶當年

汝墳遇舊

王九錫

看形容少壯違水咽寒聲流古渡山疑暮靄對斜暉相逢
一話當年事腸斷沙頭塞雁飛

喜雨詩

有引

歲貢馬盛雋

邑人

丁亥春旱麥將枯秋禾未種邑侯柏公憂形於色步禱
河山既復禱於治南白龍潭逾百餘里履巉巖披荆棘
陳牲虔拜祭時風起水湧有物蜿蜒水面雲氣騰起人
皆識以爲龍也噫非公之誠心爲民足以感格豈易致
哉公歸而雨作繼之以夜四野霑足麥秋無恙葉之有
年皆公賜也作詩以紀其事

一雨一麥生意回更喜秋禾可植我借問甘霖誰之賜我

侯柏公虔禱來初禱河山徒步走斷橋沙岸越清瀏登山
不憚勢嶽崙匍龍泉拜跪久嗟嗟天高竟不聞靡神不
舉日偃僂又聞南山有龍潭匹馬直去到山南山路逶迤
更險窄手攀木石穿山嵐山勢四面望中落中有龍池如
天鑿急呼設祭拜潭前龍現潭中雲氣作老穉望見無人
色我公鎮定奇不測應是全誠能動物神龍效靈未易得
我公禮罷策馬還片片白雲起潭邊霎時霹靂旋霧霏太
風動地雨滿天一日一夜雨不休四野有麥且有秋呼仲
呼伯及時種勿負慈母爲我憂君不見自古循良代代有
如公治蹟真不朽馴雉中牟何足羨突過漁陽張太守

過尤潦鋪懷荷蓀丈人

歲貢馬盛麟邑人

丈人不知名荷蓀垂千古人道叟何迂乃與聖賢迂豈知
聖與賢目中實楚楚試看止宿時殷勤具雞黍而今昆陽
道賢豪知幾許市肆笑迎人奴奴爲阿堵相逢非親故誰
作東道主歎息懷古人疎慢亦媚斌

王喬墓

廩生杜作楷邑人

鳧舄誰能辨有無荒郊寂歷一邱孤居人從未聞歸鶴坏
土何由幻市壺細草閒花來戲蝶蔓荆叢棘叫啼烏茫茫
千古發長笑恐是前賢誤後儒

講武臺

杜作楷

講武臺高百尺餘臺傳講武近何如蒲團坐破僧房靜曲
徑苔深過客疎雲白千層連海市石紅一片接村墟遙聞
絳帳來先漢正好呼朋講尙書

石門望隱士高鳳

杜作楷

古有蒹葭客蒼茫一望中晴巒挺舊美老樹受新風坐嘯
鳴虛谷行歌仰太空遙看曝麥處惟見夕陽紅

蒼翠高原暮松杉接地陰緬懷避世客猶見出塵心雨過
山空靜日紅晝已沈千秋多眺望把卷與誰吟

渡沙河行

庠生

馬文中

邑人

嘗憶江中掛帆遊千里之樂誠可求恨不生身江湖間日

駕南人萬斛舟吁嗟一過沙河渡却似楊朱悲歧路滔滔
汨汨千頃波烏知不作錢塘怒君不見顏君安步以當車
玉勃沈淵空嗟噓擊楫中流祖士雅何如楚丈自荷鋤又
不見西河之固不可寶長江天塹如風掃不願身蒙九里
潤但願變爲桑田世世好

贈任門孫貞婦

吏部
侍郎呂耀曾新安人

皎日嚴霜志不移一生愛誦兩髦詩塵封玉鏡孤鸞影秋
老金梧舊鳳枝穴未同時無地好心如結處所天知可憐
白髮兼黃口祇說清閨孝與慈

將抵葉馳寄馬季白牛象辰索劉公雲卿碑刻

翰林院
庶吉士 劉青藜 襄城人

昆陽令尹多好奇天龍降後仙冕飛兒戲鬼怪兩無取驚
愚惑衆將奚爲雲卿作事獨尋常但知拊摩寒與飢逋懸
如出片時蠲流者還鄉居者嬉鐫功勒德垂貞珉墮淚不
數羊叔碑當時豈少秉筆徒獨向閑閑公乞辭意取人文
兩相稱流傳萬古無彫墮遺山老子同時傑宛邱命篇何
淋漓我嘗讀之再三歎但恨未睹遺愛詞平生性耽金石
文直與歐趙爭依稀離家三舍目未徧踈漏豈免高人嗤
鼻屨一丈老柏下闕宮昨日方一窺馬秣車脂不可留手
摩心豔空移時南遊方城抵宛鄧荒祠破塚收靡遺少伯

廟與朱穆墓范曾撰刻中郎摘雨淋日炙樵斧劈龜跌零
落徒嗟咨媚生諛死佞佛老鑿鑄所在蟠蛟螭鳴吠不入
孝穆耳掉頭疾走猶嫌遲匝月南北半干路片石韓陵將
在斯況今髯李森如麻牛頭租外窮毫釐陽城元結號迂
拙雲卿名姓知者誰奇章架上富剡藤南郡帳裏多隴糜
願榻萬本爲我贈移作官箴蘇遺黎豈徒好事恣吟玩蒐
羅點綴盈茆茨

昆陽懷古

劉青藜

寒梅楚澤已殘冬落日停車訪舊蹤漫尉偏能辨灰水子
高原不好真龍冰消澧岸浮輕縠雲斷黃山露半峰最憶

并州詞賦客閉門風雪羨村農

澠水悠悠雉堞荒漢家遺跡問微茫衣冠司隸餘圖畫虎
豹軍容冷戰場寺老人來尋斷碣雪睛鴉聚噪枯楊澆寒
買得村帘酒指點興亡話夕陽

輓陳趙兩烈婦

進士白士宏

新鄭人

曾聞曹氏婦斷鼻勵霜雪又聞盧家女白刃濺丹血巾幗
振綱常矚然永不涅昆陽兩烈婦風規又各絕陳氏守素
幃冰蘖自飲歡衛身有奇謀裳衣綴百結何當風雨狂運
胎慘刀折投繯明月下浩然完大節吁嗟趙氏死儼與陳
同烈汚手未汚身肝腸碎萬裂泉臺何所怖與夫竟永訣

嗚呼人生無真性罔生猶沒滅况當見危時幾能懷清潔
卓哉二烈婦後先相顏頡芳名昭青簡丹心百世捐

入志館

庠生程沐邑人

文章昭信史筆削寓規箴須具千秋眼毋欺一片心簡編
垂自昔風土問於今疑義欣同晰濡毫墨勝金

遊山莊

賢良方正杜曰讓邑人

久慕林泉幸已通石門斜日到庭中搖風柳滿生機綠喜
兩花妍別樣紅躍馬相期誠覺老看山不信突成翁欣逢
勝友如雲會對飲名園興未窮

寺門遠眺

杜曰讓

倦把長筇倚石根。平川十里眺松門。樓臺掩映誰家院。榆柳參差幾處墩。僧背斜陽歸古寺。人依野渡入山村。啼鴉不識寒煙晚。猶自啞啞繞樹喧。

中秋讌集歌

歲貢王統邑

君不見。寥濶涼天靜。無塵倬然雲漢燦。有文又不見。皓皓玉鏡城。顛掛天香桂。子何紛紛。人生際此。能有幾。胡弗畢集樂同心。同心之臭臭。如蘭况逢素女夜。娟娟攜殺載酒羣。促膝忘形忘迹。更忘年。一時佳會多奇傑。竹林何必遜七賢。請君暫坐側耳聽。姓氏爲君歷歷傳。蒼然鬚髮有老翁。獨將明道承雪庭。揮麈高談驚四座。憑將一世盡目空。

誰是雞羣出衆才擊壤今見古人來挺挺瘦骨清而秀短
曲無脛信口開脫頽自是屬人豪玉體聊同晏子高喜怒
不形推養到斗酒愈飲興愈饒德星又見聚昆陽追琢其
章金玉相高山流水琴三弄樸茂真堪傲羲皇更有矯矯
武庫客學通九邱與八索舉觴坐對話千古偉論爲我開
茅塞白眉年少最無儔瀟灑成性不知憂談吐別有異人
趣醉後雄心射斗牛庸才自愧渾如癡無復鶯羣來口書
下採幸不遺葑菲謬與諸君號相知相知相知須盡醉休
把嫦娥空相對今日今宵不常有明日明宵豈常會陰宜
惜逸宜戒道德須自磨功業誰能代煌煌聖治賴吾輔

嗇民生賴吾泰莫漫只圖南樓樂頓爾忘却平生概

詠黃義士

副貢 邢有仁 邑人

匹夫知慕義此語人共傳以之覈行事舉世何茫然昆陽
黃國輔奮起古人前家貧業梓匠謀績琴上絃一日新人
至向隅泣漣漣身本王氏婦孀居三十年阿叔老且病貧
無買棺錢無奈將身鬻志節盡棄捐國輔聞此語凜然自
抱愆女子惜名節違心事行權我當成汝志完璧送之旋
入門睹四壁蕭條如磬懸病翁臥牀頭竈冷無炊煙斯時
動惻隱餘貲解腰纏數年蓄積盡生涯甘屯道此事與馮
商先後可齊肩况以樸魯質未嘗窺簡編高義發至性真

學而覺賢是堪勵偷俗譜之風詩篇

詠劉烈女

郝有仁

人生本有剛大氣浩然常伸塞天地身可以殺氣不屈挺
立英稜鬼神悸此氣全者無幾人強半皆是鬚眉身不聞
閨中弱齡女豎起風烈更嶙峋惟有吾鄉劉羣姐巾幗流
傳古來寡想像壯氣盪心胸海濤萬丈向空瀉生本貧家
住鄉村爲親服勞偶出門何來鄰兒楊二黨突起狂謀白
日昏大呼拒賊皆欲裂白刃霜飛赤手格堪胸透背命已
終僵立如生氣猶決喧傳千九萬人觀張目持帶血洑瀾
凜凜生氣髮上指風雲色變草木寒賢侯一見涕橫流如

此血性世罕傳焚香再拜具棺殮天地茫茫元氣收爲傳

爰書達

上朝罪人伏誅冤憤消

詔下烏頭樹棹楔崢嶸義烈薄雲霄曾聞嚼齒張睢陽常
山罵賊舌吐鏃忠臣義士那惜死爲秉正氣扶綱常沈吟
斯事將百年祇今藉藉人豔傳彼一女子能如此丈夫臨
難何頽然

弔董烈女

祁有仁

踰禮以守信聖經未褒揚或以死傷勇未足云中行豈知
屬頽俗其事倍激昂況在兒女輩更覺邁尋常前有許婉

妹偉節若昆陽閱世三百載誰與相頡頏桃奉董氏女窈
窕在閨房許聘崔氏子未及百輛將夫婿適邁疾玉樹竟
彫傷訃至舉家歎女也暗斷腸許人當以死此義盟不忘
雖未經身事前約炳煌煌所天既已失吾生復何望不如
從此去同歸查冥鄉志決情不露私自理新裝夜靜人聲
息沐浴更衣裳稱身潔且整事事皆周詳然後取白練毅
然縊屋梁詰朝家人起相看始驚惶雙親爲一痛泣下淚
浪浪知女用意深不令擾爺娘生同春花萎死堪秋月光
應與許氏女後先並馨香如何五十載無人發幽芳至今
貞墓在寂寞昆水傍我曾過其地肅瞻爲徬徨炎天墓上

草凜凜含清霜

雙鳧宮

翰林

張問陶

遂寧人

冷冷笙鶴滿緱山却弄雙鳧不肯閒我亦神仙舊官府偶
從飛雨過人間

石門山

舉人

孫克猶

邑人

結屋石門山山深徑亦曲把卷忘漂麥奚貪五斗粟經史
怡我情身世兩無觸

石門山

杜永標

邑人

石門雙峙鬱崔嵬春日登臨淑景回一路翠浮芳草嫩幾
株香繞野花開高風縹緲人何在訪古殷勤我獨來指點

當年漂麥處依稀猶見曬書臺

寶邨匪人倡亂卽事

杜永標

不了川湖亂中原又逞兇勢張無遠近兵至却從容郡邑
搜城守鄉村苦賊衝堪傷邨鄔地眼見起煙烽

彼衆我偏寡遲疑不敢前愴懷皆苦地何處可安眠蔽水
尸東下沿村火夜然干家同一哭望救只呼天

徧野哀聲起蒼黃避賊來河干爭殞命路畔忽拋孩骨朽
如山積血紅順水迴何時得飛將解此倒懸災

欲返却難返思留不可留危時窮進退大地積悲愁骨肉
還吞噬強梁盡寇仇腥風回首處毛髮令飈颼

輓邱將軍

邑令

秦茂林

肝胎人

將軍之祖國虎臣海疆勛業圖麒麟將軍妙齡充宿衛胸
中甲兵何紛綸始立戰功自畿輔

帝遣雄旌鎮宛土軍容真見李崇彪賊膽驚李敬虎六
年南北馳征鞍腰間寶刀無日閒纔見捷書飛下蔡又橫
鐵騎度嵩山頰上孫劉恣兇燄移節頓源日交戰賈勇金
緣死士揮扶傷淚爲征夫泣干兵過市市不驚萬馬不踏
田邊苗望重譽歸搜物忌綠章夜奏二鼓驕己未王春春
二月捲地黃巾多於葉將軍上馬勇追賊三日何曾暫解
甲疲兵半作沙場鬼赤手撐天無寸鐵舞陽城北北無

風日蕭蕭偃大樹死人堆裏面如生
犬鳥無知猶守護呀
嗟乎何代擁兵無賀蘭
何時搖扇無宏淵
世輔撫膺師竟
潰睢陽嚼齒軀空損
呀嗟乎古來烈士盡
如此一腔熱血
報天子將軍將軍有死耳

壬戌夏與杜仲護談葉邑風土有作 秦茂林

茲地古汝墳風俗最醇古村人多老
壽公庭少雀鼠四時
兒讀書絃誦無歌舞
和平召豐稔造物酬
甘雨場登高風
麥家釀荷蓀黍桑麻
歲有秋棗栗利尤普
嘗聞民在勤百
福生辛苦君看蟋蟀
儉終勝蜉蝣楚願言
常守此桃源在

鄉土

石門山

舉人萬鈺邑人

飛巖高不極對峙想天開一徑隨溪轉羣峯覲面來村斜
還隱約人往幾徘徊指點持竿處白雲覆綠苔

留得山川住幽芳許細尋書聲和雨靜教澤其雲深跡恐
難埋沒名偏耐久今心心千載印祠宇倚青岑

遊卧羊山

邑令何鼎貴筑人

汝墳河水流湯湯河畔羣石如羣羊千頭萬角負土出疑
起疑伏森成行似爭似讓似抵觸或進或退相頡頏雨淋
日暴霜露覆虎豹雖遠虺蛇藏誰知冉冉歲月古但見年
年春草長涪翁去後近千載行踪寥落山雲荒徃來三次

紀游蹟爾時想見冰雪腸山僧拙樸過客少坐令邱壑成
滄桑諸君好古恣探討摩巖手剔苔蘚蒼石高徑僻字完
好羶墨響榻聲浪浪攜歸一本掛素壁炯如明月懸清光
孤松怪石露筋骨長刀大戟森鋒鏖嗟余一身望吏事俗
不敢俗狂難狂昔賢勝跡在咫尺尋幽未暇空徬徨西風
指日掃炎暑虔陳野斂傾椒漿後生懷抱亦有託俯仰今
昔成低昂鄉人何各地一畝恨不早建公祠堂時和政成
百廢舉願祝百姓歌豐穰

遊黃石山

邑令何鼎

貴州人

晴煙漠漠水潺潺碧嶂丹巖曉叩關十載浮名寄宦海一

宵清夢落空山松梢月上諸天靜大野雲歸獨鶴還試問
駐顏砂在否臨流愁照鬢毛斑

蕭然道院似田家竹舍柴扉石徑斜丹竈終年炊榸葉仙
庵無地訪桃花林深忽訝陰晴變麥秀終嫌物候差一脈
甘泉寒沁骨何須更問惠山茶

天門層疊接飛梁應有仙蹤在上方浪說素書傳孺子至
今黃石卧斜陽殘碑尙記前朝寺廢壘猶存舊戰場下視
平原無限感紅塵如海路茫茫

盤空鳥道認參差絕頂風雷護古祠百里山城酬宿約千
年老樹愛新枝飛鳧此地知何處採藥重來定幾時莫怪

行行再回首出山雲嬾水流遲

雙鳧宮

魯山知縣胡廷楨貴筑人

泥痕鴻影認模糊十載浮沈誤宦途回首黔山歸未得欲從仙令借雙鳧

題杜仲護卧羊山圖

進士戶部員外郎歐陽雲彭澤人

吾聞金華山牧羊倏爲石石亦復爲羊變化不可測何時驅之入此間在谷滿谷山滿山後世撫字漸無術叱之不起非其頑我昔山前數來往遙羨此中蕃牧養徑欲招同白石生日煮一脍持作羹更呼廝養黃初平細論牧事觀其成不羨騎都尉安知關內侯幽人意興別有託偷閑且

作山中游山中游客竟誰是前有涪翁今杜子剜苔剔蘚
自鐫名麟閣標題只如此許子亦好事寫作茲山圖縱橫
偃仰各意態生風習習噓春燕吁嗟乎世間萬事多翻覆
用以釁鐘羊穀鯨從來羶首著詩歌石不能言慎爾牧

尙書臺

邑令 歐陽霖 彭澤

講武當年事遷流尙有臺亂離資保障文讌共追陪寰海
黃巾靖名山絳帳開登臨無限意弔古重徘徊

獨有山邱感滄桑幾度經斷碑捫蘚讀往事倚欄聽寺古
僧如寄鐘埋佛不靈遙憐修剝日珍重薦椒馨

突兀孤峯起欹斜怪石藏四圍絕依傍一境足徜徉寥廓

宜招鶴風光似卧羊何人工點綴重與話清涼
垂幕諸天敞平疇萬頃饒遠村碁布子歸路斗回杓紅葉
秋風老黃花故國遙重陽輪指近相約躡雌曉

頌

荷祿丈人頌

高士傳

丈人絕軌倂接洙賢天涯日暮雞黍是延載陳夫子尋返
客轅先幾掃迹虛室依然

長沮桀溺頌

悠悠沮溺並耜荒墟敬詢濟渡暫駐浮車飄然無咎齊日
致譏物情不足隱德有餘

贊

荷蓀丈人長沮桀溺贊

晉陶潛

三五道邈溇風日盡九流參差互相推隕形逐物遷心無
常準是以達人有時而隱四體不勤五穀不分超超丈人
日夕載耘遼遼沮溺耦耕自欣入鳥不駭雜獸斯羣翳翳
衡門洋洋泌流曰琴曰書顧盼有傳飲河既足白外皆休
緬懷千載託契孤游

高鳳好書不知流麥贊

後周庾信 新野人

高鳳好學專心不迴流連經笱對玩書臺石門雲度銅梁

重修廟學記

金翰林
學士 趙秉文

大虛寥廓一氣渾淪日月星辰風雷山川動靜離散消息
盈虛獨陽不生獨陰不成一則神二則化所謂易有太極
太極者中也人受天地之中以生天地不能成之父母能
育之不能教之有聖人者範以中正仁義之道而人極立
焉自唐堯虞舜夏禹相傳授以執中精一歷六七聖至孔
子而大備其精則道德性命之說其粗則禮樂刑政之法
其教人始於戒慎恐懼不睹不聞之間其極至於高厚配
天地其學始於致知格物正心誠意至於治國平天下要

其極而論之本末俱備精粗一致無太高難行之論無荒唐怪誕之說聖人得其全賢人得其偏百姓日用而不知天地以此而位日月以此而明江河以此而流萬物以此而育故稱夫子與太極合德禮春秋釋菜於先師自京師至郡縣皆得以特祀孔子葉劇邑也歷前爲政者皆不能廟而宇之劉君從益由監察御史出宰於此乃先從事於學率鄉民之秀者日省而月試之可謂知本務矣未幾召入翰林又得剋石烈君相繼爲政踵而成之凡爲殿三楹堂三筵左右廊廡十有四前三其門傍四齋而下至庫廚咸備如法望之巍如入之肅如士興於學民服其化嗚呼

休哉人皆有良知良能第未有興學立教以啓迪之耳顧
有以葉公好龍之說告之者乎凡士皆以種學績文爲進
取之計而不知治心養性之術入官者以謹簿書急功利
爲能而不知愛民行道其實皆好假龍者也天之所以付
授我者與聖賢同而猶未免爲鄉人者利欲蔽之耳誠能
人欲日消天理日明吾之心卽天地之心也其於聖人教
人之意不亦隱有合乎昔葉公問孔子於子路子路不對
孔子告之發憤忘食樂以忘憂由今思之其所以教當世
教後世者何其切哉劉君渾源人南山翁之後聰明質直
又精於道義之學與其子祈俱以能文稱剋石烈君望雲

東志 卷九
人嘗爲赤縣警巡使一君所至有聲非特一邑之著蹟而已也

葉公劉君請減糧額記

趙秉文

吾友翰林修撰王君從之嘗言君子有惠政而無異政史傳循吏而不傳能吏吾嘗誦之云耳如吾葉令劉君既有惠政又以才幹稱可不謂全乎君諱從益字雲卿應州渾源人南山翁之曾孫也第進士任監察御史知無不言與當途者辨曲直以罪去天子憐其才起爲葉令下車勸學講義從善抑惡一之日厲而教之二之日惠而安之姦吏惡少望風革面君曰未也事有大於此者葉劇邑也路當

要衝歲入七萬餘石寇攘之後戶減三之一田不毛者千
七百頃而賦仍舊可乎請於大司農減三萬石民賴以濟
流民自歸者數千未幾被召百姓詣省請留不果授應奉
翰林文字踰月以疾卒葉民間之以端午設酒樂爲位而
哭越明年遣李若愚來乞銘嗚呼非君之才之美之惠烏
能使民既去而挽留既沒而不忘繼之以泣也哉乃爲詞
以招之命曰悼騷以慰其父老之思其詞曰皇天賦予若
人兮鍾南山之粹靈紛吾既有此淑質兮又申之以修能
擷六藝之英華兮襲八桂之芳馨我余冠之豸如兮胡獨
罹此謫也飛予寫之臆如兮胡遽去此邑也蘭秀而摧兮

玉貞而折也。猗才之富兮，胡壽之嗇也。噫嘻！將騎箕尾上比列星乎？抑乘白鶴下顧遺民乎？將爲景星卿雲以瑞斯世乎？抑爲祥風甘雨以濟民人乎？維此葉邑君之柯，鄉魂兮歸來無去故鄉些。

葉縣中嶽廟記

元好問

河南中鎮所在，在所率有祠廟以奉嶽祇。葉距崧三百里而近，獨無有也。邑門之南百舉武少折而西，有地焉，直居民之衝，顧望宗顯，父老規爲嶽祠，舊矣。秦和末，太原祁人樊道真始以邑人之意而經度焉。地本故隄，廢圯已久，荆棘瓦礫，蛇虺所舍，樊身執畚鍤，剗治蕪穢，實以板築，白日

而廟基成邑之人知其堅固可任也乃羣起而助之資鄉
豪張祐孫寧泰商人党珪爲之倡廟既成邗人有以白石
爲中天像欲輦而北者道真請而事焉予嘗謂小人之情
畏之而有不義恥之而有不仁威之而有不懲獨於事神
若有所儆焉何耶徼福於方來逃罪於已然百求而百不
可得然終不以百不可得而廢其所以求也富貴光榮壽
考繁昌人既有以求諸神忠信孝弟廉讓篤實神亦有以
望諸人吾嘗見夫世俗之所以事神者矣崇祠宇嚴像設
刲羊豕具儀衛巫覡倡優雜然而前拜跪甚勞迎送甚勤
求神之所望於人者無有也陰害賊詐刮利次骨利之所

在無復天理公噬潛搏惟得是期內人於溝不恤也血人於牙不饜也志得而意滿則曰我求於神神報我者如是也故搏噬愈獲報謝愈豐禱求愈奢香火未收而陰害賊詐之心已怫然於胸中矣此直蛇神牛鬼之所不忍臨而謂嶽祇之聰明正直者而臨之乎記有之雖有惡人齋戒沐浴可以事上帝謂小人之不可以事神不可也豈第君子求福不回好是正直介以景福謂神之可欺尤不可也嗚呼神有固然二尺童子所能知而人有不能知者特溺於貪而不能自還耳惜乎莫有以二尺童子之所知者而告之也癸未之夏予過昆陽進士韋仲安道樊之意欲得

吾文以記其經營之始故爲書之且告以福不可邀禍不可逃也如是庶幾來者有所儆焉

郭公重修廟學記

元梁
縣尹羅允登

學校莫成周之盛夫由國以至於家必有其塾則其設之也廣由始考視歷七年又九年而大成則其教之也詳由士而升之司徒又升諸司馬必論定然後官之爵之祿之則其擇之也精用之也至故其功用之極至於化成俗美而禮樂以興此成周之學所以爲盛也迨夫春秋之季魯作泮宮而頌興武城聞絃歌而聖人莞爾豈不以成周之風不復見之天下乃於一邦一邑見之又安得不重爲之

感而深爲之幸也哉後世郡有學則自漢始縣有學則自宋慶厯始雖未及周之盛然而郡得一人焉如文翁者而俗變縣得一人焉如陳古靈者而學者翕然有所興起亦庶幾鄒魯武城之爲者葉故有廟學歲久不治至元戊寅燕山郭公岩舉適爲令尹果達練事游刃有餘始謀撤而新之一時監伯顏公政卿簿司劉公從道咸是其議而文學金君誠善尙公之爲請得躬先其事而董其役逾年功用迄成於是大成有殿從祀有廟師生之堂食息之所門垣戶階位置行列咸中程度士瞻有赫民不知役咸用興嗟嘉公之績縣之秀民試爲吏曰李氏字從周者謀之慕

史李君相與爲書屬余爲之記余惟吾夫子之靈如日月
之揭照於天無乎不在而其道之大則如元氣之運四時
之行周流充塞又無徃而不存夫豈以是廟之成毀爲興
喪哉然廟焉而生敬乃人心之不容已而學必爲之詩書
禮樂之教又人事之必然由詩書禮樂以致其問學則自
夫格物知性以至於命此博文之能事由吾敬心之不容
已則自夫戒慎以至於致中和而位天地育萬物則又約
禮之極功昔吾夫子之授顏子以此弟子傳其道以此而
夫子之道若周之所以爲學學之所以爲教皆以此則凡
學於此師若弟子知所以不懈而求其至焉窮而獨善猶

將善一鄉善一邑立言以詔來世俾興學者無愧於古之人達而兼善則成周之盛化及天下者其必自葉始矣此則郭公新廟之本心而因以是有待於諸君子者至正改元前進士從事南陽府梁縣尹兼管本縣諸軍奧魯勸農事羅允登記

儒學祭器記

元宣慰司都事俞焯

古禮至今存者社與學而已古之人考室用成其於燕器不先祭器示民以孝必有先也而况學三代共之爲明倫厚俗之地其於禮器庸可後乎葉縣學春秋二丁朔望奠謁盤杆苟且取辦臨時主者視爲迂濶漫不加意觀感之

道或於是乎廢焉至正四年七月縣長閻閻公慨然有感於爨器之非古而二代禮器後民無復知者乃織竹而邊篚以新斲木而俎豆以完範銅而壘洗以備鼎銅盥盥盥尊爵玷以具凡百二十事一依釋奠儀式以是年十月庚子櫝以藏之立職司以守之鏄固以時盥用以節諸生周旋俯仰升降亟習於儀觀聽於以不惑其作民於禮也將以興民於行也古者祭器不假亦不假於人雖曰邊豆之事則有司存而公能爲人所不爲其果度越僚等矣後之人恪守茲器相與存之勿抱而適他邑勿毀而鬻於人存器於禮存禮於教不以一邑而自小之將見大道不器有

不止於瑚璉者間閭公之治其於近悅遠來聞於葉素矣
所由先於學以示諸生詎曰徒器乎哉請以是記

葉令王喬祠記

國史院
修撰 張 彥

雙鳧觀漢故葉令王君之祠也君諱喬河東人顯宗明帝
時爲尙書郎出宰葉葉屬畿內朔望來朝得雙鳧後以玉
棺下墮爲羽化之期時人以爲神立祠以祀此觀之所由
立也嗟乎自漢迄今千百餘年間王侯將相之家氣燄赫
然繕治第宅務極侈靡自謂常處晏安足傳永久者何代
無之或未落成而身已物故或罹世變而化爲灰燼求其
廢址所在皆湮沒而無遺矣是觀以一縣令之微長存於

世廢而復興祀以不絕其故何哉彼至人者無求於人不
累於物以事業爲土苴視富貴如浮雲逍遙於八極之表
與造物者游視沒溺於污濁之中膠固而不能出者相去
遠矣所以後之人聞其令名仰其神異向慕崇奉而不忘
也通師大虛王道沖亦河東人受業於披雲真人之弟子
惴惴無華勤儉以愿大德十年被立教大宗師之命主是
觀其始至也惟存一殿奉安太上混元皇帝僅庇風雨而
已乃與其徒拾瓦礫除荒蕪開隙地種畦蔬自食其力日
儲月蓄迨及兩紀計量衣鉢之餘規度土木之役道沖以
爲觀名雙鳧玉君昇仙之所也唐金碑實列諸庭而無廟

宇以寓其神可乎哉乃並正殿之左築廟三楹奉君神像
翻修正殿以嚴祈禱靈官祠齋衆室以次而舉蓋二十餘
年始克幾備將刻石以紀興復之由不遠數百里而來謂
余書其事乃爲之書按道家以清淨無爲爲宗慈儉不爭
爲行全真之教是也至於飛仙變化之術丹藥符籙之法
舉歸道家此道沖所以主茲觀也歟既敘其事復作詩并
刻之以祀君焉其詞曰君爲漢室尙書郎出宰葉縣其姓
王朔望朝見來洛陽太史但見雙鳧翔網羅得鳥驚莫量
乃昔所賜出尙方玉棺下墮君之堂天帝召我還帝鄉沐
浴潔服卧中央其蓋自覆如掩藏形則瘞埋神不亡風厲

雲中臨此邦福我遺民保農穰祛疠疫厲除災殃商孫道
沖師老莊歲時竭虔奉烝嘗奠桂酒兮藝檀香世與混元
同久長中庭樹碑刻銘章後人尸祝思無疆

重修城隍廟記

明牛鳳邑人

祭法曰能禦大災則祀之能捍大患則祀之城隍域民固
國功同禦捍廟而祀之意蓋出此粵自聖神御宇建邦設
都肇祀百神禮緣義起宜無不舉之典而城隍神祀自隋
唐以前略不見於史志考之賓退錄謂蕪湖縣城隍神祀
建於吳赤烏二年不言出於何典南齊慕容儼梁邵陵王
皆嘗祀城隍神史傳因事書之唐李陽冰作縉雲縣城隍

神記亦謂祀典無之韓愈柳宗元皆有祀城隍神文至宋始錄於祀典自是始著我葉城隍神廟未詳創於何代據南陽舊志洪武元年重修督其成者王簿諱文昭也成化十一年繼修任其事者耆民慕俊也歲久滋敝弗稱神休耆民劉昇等鳩衆力改作之羣工咸集次第効力土木陶繪靡不用極首作正室五楹楹十一架廊廡二十八楹楹五架傑壯輝煥允稱神居像設嚴肅觀者聳惕堂後右方作正屋四楹爲新令齋宿所旁屋三楹用棲守廟道流經始於嘉靖三年積歲十月有三其功始成可謂難矣劉昇等請余文以記余因博考而備書以貽之俾來者有所考

焉粵惟神之庇人必受命於天民之圖報亦念出於誠神
人相依惟正是保故福不可以諂求禍不可以倖免幽明
無嫌各得分願禮之嘉道之中也夫聰明正直是謂之神
哲人知之衆人未必知也余懼民之私祀者或干匪其正
以小人之腹度神明之心鄙褻瀆慢自速顛隳既弗自咎
顧以病神妨教亂俗非細故也故書此以爲近鬼神者告
庶幾諂瀆者流有所驚惕而神亦得安靈其間不爲所苦

云

重修澧水石梁記

牛鳳

古葉城北澧水東注舊有石梁二十六空橫跨清波不知

創於何代閱世滋久山水衝激漸就崩頽復泐於暑雨剝
碎殆盡此地當南北通衢凡雲貴川廣之朝宗京師及賓
旅往來車輪馬蹄交馳奔走晝夜相望冬寒病涉行者苦
之將百餘年矣工費甚鉅有志興作者率以爲難嘉靖八
年義士劉瓚郭明等籲衆倡謀和者雲集乃召工計費鳩
金儲石因故基而加廣增高日積月累凡十餘年而後歲
厥事爲梁四十一空空一仞凡三十餘丈緣以巨石壓以
水獸聯以金錠工巧謀周堅壯駭目瓚等以功成不易衆
力宜彰徵余文以託之貞珉用示有永所以昭往而勸來
者其意甚美余故不辭而爲之記夫橋梁之設所以補舟

楫之所不及利濟攸徃德在生民自周制不講而興廢舉
墜之功乃出於鄉之善士褒獎之餘又不禁爲之三歎云

改正諸葛武侯祠記

牛鳳

嘉靖丁亥秋余自太僕轉南京太常卿便道還家行視田
墅始謁武侯祠下見其屋老而壞且怪其與昭烈俱南面
無復君臣分詢土人云如是有年矣及考舊志洪武十八
年民蕭田重修記不知其所始慨然久之遂捐金幣屬鄉
耆徐行合衆力作新之不期月廟貌完矣撤去昭烈關張
之像獨像侯祠中專其祠以符其名人心允愜觀者胥悅
既而遊觀山寺有斷石幢在焉刻文僅數十字中云此地

有諸葛之舊墳墟高陽華里然後知侯之父若祖自瑯邪避地曾寓於此而葬焉躬耕南陽尙在厥後祠而祀之信有由然再考石幢歲月蓋隋文帝開皇壬寅物去先主見武侯於隆中之歲二百一十六其居此地而葬必先十餘年是以墳墟猶存今距開皇壬寅年餘九百六十一世遠墳沒不知其處固不足怪所幸祠宇不廢斷石幢僅存豈偶然哉蓋侯之爲人論者舉儕於伊呂古今賢達悉以爲然無異議焉是人品之高勳烈之盛光昭汗青膾炙人口者矣侯吾言顧以吾邑有高陽華里之蹟實爲侯父祖之故墟湮滅無聞以至今日良可悼惜吾生千百年之後得

有所據故託之堅珉以圖不朽又以資論世君子云

交遠堂記

牛鳳

昆水南八百步有泉出平地沮洳泓渟漸成溪流力足勝舟東行三里復折而北西唐牛鳳卽其折處作書堂以向之復達其西北引水繞焉以爲養閒之所乃名其堂曰交遠蓋取陶詩平疇交遠風之義然創物命名非文弗彰遂援筆而述之夫陶公妙句所以寫一時之清况吾取以名吾堂特假以寓吾意云爾原夫人之有情雖出於心而觸外裕中實藉乎目故心或有時而不憊目則緣境以起予交遠之不負人也如此豈可少乎是以清明之朝和煦之

日遠村四羅而擁翠遙山列峙以效奇望高鳥隱隱以常
驚瞻飛雲冉冉而就微起遐想於倏爾聳精神以超然此
達人之大觀也又如春宵秋夕長空遠漢爛然星月之交
輝茫乎宇宙之寥廓步清流而聽鳴鼉酌醪醕以歌楚些
此幽人之雅致也時或狂風大作塵霧障天或因之而雨
零或緣此而雪作或雷電晦冥或冰雹摧擊此又非常之
遭環奇之象也常變往來千態萬狀稔熟於目而昭晰乎
心凡死生壽夭成敗榮辱之念一掃而盡除矣由是心源
澄澈性境融和可以隨遇以皆安可以無往而不得謂非
交遠之功不可也吾以名吾堂意蓋如此或者謂子以交

遠覓清樂似矣獨不見顏氏子簞食瓢飲不改其樂豈不可師而必曰交遠焉何也曰顏氏之樂儒者之極致非旦夕可以驟到吾欲取適目前與曾點爲伍方自以爲善覓樂豈敢爲顏氏耶蓋顏氏之樂幾於從心吾之適欲以養心精粗淺深雖若不同要之皆超然於物表者也又何必舍此而取彼乎且吾聞羲皇以上稱葛天無懷之民於時文字未作教典未興求其所學與其所以樂必有在矣是故畫後畫前學易者宜並玩之或者擊節歎曰吾釋然矣甲午仲春旣望昆陽牛鳳記西唐其別號也

大安寺重修佛殿記

牛沈裕 邑人

夫佛教興於西域其來尚矣永平紀元波流中土揆厥濫觴蓋亦二正之間乎昔包犧御寓道統開先猶龍降周元關啟秘豈伊明心見性之妙顧不儷美於茲哉粵自金人入漢法像斯崇白馬東歸譯經大布晉宋以還窮茲土木招提蘭若飛甍邃宇始蔓延炳燦於四部之中矣五衍斯馭八政宏開拯濟衆生咸躋壽域瞻法輪之常轉望彼岸以遐登然興廢隨緣天人一致否泰有數道俗同塗厥亦自然之理歟大安寺者元魏之丈八寺也據山河之清勝謝井邑之煩囂平原曠其超忽喬林鬱兮掩映卓錫之始杳邈難稽石幢僅存遺文莫辨要之涉禪餘干亦不知凡

幾廢幾興矣宏治癸亥之歲僧洪釗總持寺事棲神淨業
志闡宗風悲塵劫之難窮悼宏基之就墜乃庀徒揆日革
故從新遐邇靡風翕然響萃衆力旣集不日成之并幹嶧
其干霄丹雘煥焉溢日麗表新儀壯增舊觀小大快覩天
人胥悅逮今年垂五紀泯茲善業惜矣釗之徒曰道策始
礪石而鐫之其辭曰權輿邃古厥初生民渾混未鑿載樸
載真風氣旣開樸散真淪僞滋弊起泯泯芬芬情塵愛流
年華日富教泥風靡道荒法斲爰有天人篤生淨土悲此
淪胥指迷津渡慈航東楫普濟南州法筵大啟惠澤宏流
何年飛錫遠卓茲邱珠宮延表寶刹斯留滄海桑田雲車

風馬俯仰閃儻流光冬夏霜飛繞棟雨翻飄瓦闐其無人
誰歟興者偉矣釗公惟善是耽慧通夙悟朗徹冥緣渠渠
夏屋嶽峙波連猗歟輪奐耀後光前右據清川前揖列岫
風雲獻奇坤靈聳秀名區勝果載覲不構法侶瞻依寶姿
委侑高明靚深矢棘翬飛下移寒暑上干翠微晴雲在輶
朝日騰輝虹霓星宿迴帶芬楣雄成孔安有嚴象設辟容
清穆龍象森列翊贊皇猷輔佐玄樞刊頌貞珉永昭休烈

二賢祠記

刑部張守直
尚書

西唐山在葉西南六十里羣峰環翠沃疇平衍前儼雙闕
名曰石門卽漢隱士高文通漂麥處也唐李太白集中有

壽高君幽居蓋其地云距西唐南五里牛公敕葬之墓在
焉公舉正德庚午科賢書登辛未會試榜第六號平山又
號西唐少時慕高鳳之爲人因名與高公同自倦仕後愛
西唐山水與親知遨遊每歷幽深探石門後卜地遂以妥
窀穸葬二十二年葉中父老不忘公行請祠祀之又曰高
公葉人可無識耶縣尹何公鳳起躋而歎曰二公雖隱顯
異時亮節高風允宜併祀因訪石門式公墓步入西峰下
得平臺廣畝許高十丈詫曰此爲高公居無疑矣宜祠此
遂鳩工程材付鄉人毛士夏董其事趨者繹如逾月而祠
成門廡未就何公量移去黃公嘉善爲經理煥然備矣

公嗣唐麓君託記於余唐麓遠於文學與其兄並以科名
治行不承公志嘉靖中督理遵化鐵冶治人德之不啻二
天與余素敦銓雅余又慕西唐公詎不敢辭嗟乎高牛二
公相去千餘載矣何始稱名而同好終比德而擬神耶方
高公之披卷也外不遺內道不徇物得象忘言殆不知雨
之將至故觀書非書內志專焉見麥忘麥可大受矣而竟
以隱終道隆則隆道污則污論其世可也乃西唐公出而
應世事功崛起輝煌鼎彝非適逢世乎要非離道以爲達
也初授吏部驗封司主事遷庵楊公爲太宰因試滿命題
范文正振作士夫功何如謂公超衆蚤以文正期之爲驗

封卽與晉溪王公議事持正不詭戛戛然逾月王公悟曰
始謂君太執全乃知大有執持遂倚重焉嘗諫武廟南巡
人以利害惕之曰吾何避斧鑕哉罰門跪五日杖四十其
時公不知有身又何異文通之不知有麥乎耄年築室城
南讀書賦詩一物不入胸中其隱跡又何異文通乎故或
終書卷以自娛或際風雲而若素易地皆然風斯烈矣今
人奇二公至以唐王中允爲擬中允維嗜禪號摩詰嘗自
題云安知摩詰士不是老夫身蓋其杳冥於同可勿論也
要亦扶輿正氣孕毓山川有不同之同者詩曰維嶽降神
生甫及申其二公之謂乎建祠隆禮使後人知嚮方焉斯

併祠意也來者其尙鑒於斯

葉令王君祠記

南陽同知匡鐸膠州人

葉縣南二十里曰昆陽鎮卽漢葉縣也明帝時河東王喬以尙書卽遷葉縣令有飛鳥諸神異事民立祠祀之相傳至今祠祀不廢而歲久傾圮遺址僅存萬曆庚辰余過昆陽步瞻故墟問之土人謂城北基枕澧水處卽其飛鳥地也余因告以王喬故事意當時必有厚澤及民祠不可終闕衆乃驩然樂於趨事白之邑令黃君綜理之卽故址建祠二楹左右翼室各二楹繚以垣墉設以重門祠後卽前所言飛鳥處增築一臺顏曰飛鳥覆一亭額曰景仙而於

通衢復表以石坊俾好古者舉目知爲喬遺跡所在云明年辛巳工竣時余奉檄攝方城郡事鄉約吳廷廷相師孟閱梁夢麟等來請余記按祀典有功於民則祀之喬治民事無所考然卽諸神異事推之其爲政必非不能庇其民者且輕視富貴足以廉頑起懦而生氣猶昭昭感應不爽民至今仰賴之其功固不特在當時且垂諸後世矣祠而祀之宜哉獨怪應劭所載喬事雖神異然近不經而范史復以列諸方伎傳似皆不足以盡喬竊意明帝崇佛信道豈一時好尙多方外之事故特紀其神異而略其治民之事乎然喬一縣令也歷千百餘年而祀典不衰其必有

以致之者後之有治民之責者當有所慨於心矣是爲記

高公重修廟學記

舉人 申嘉瑞 邑人
知府

葉故有學其創建不知所自始元正大三年重修入國朝而益增拓之二百年來遞廢遞興近歲尤甚勢且不支歲丁亥平湖高侯瀛臺奉命來宰葉釋菜旣畢睹茲敝陋懼人材放失儒效疎濶以負聖祖建學育才至意於是請於當事咸報可乃聚材鳩工加修葺焉因首事正殿五楹扶傾易蠹黜堊丹漆舉以法次及東西序次戟門次櫺星門門外故有綽楔三象魏闕乃撤而新之復折而西爲馳道樹以坊題之曰聖域賢關以至明倫有堂賓射有圃博士

燕寢罔不周節肇工於萬曆十七年四月以十月落成經
費悉捐俸佐之筦庫之士無所與於是邑博士王君邦靜
羅君桂令狐君濂暨諸生路可大牛孟熙王瀛士謀紀其
事於麗牲之石而以執筆之役屬嘉瑞嘉瑞乃諭於衆曰
郡縣學校之設惟太祖高皇帝規模宏遠度越千古以故
士遊其中者掇巍科躋臚仕出而當國家用罔不砥礪名
節號稱良臣卽終身黌序者亦恂恂雅飭不失爲獨行之
士頃者承平旣久風俗日敝無論齊民冥然罔喻卽士人
窳惰驕恣莫之挽矣爲宰者日治程書飭郵傳尙不遑暇
安能念及學宮之興廢士風之淳漓乎今高侯潔已愛人

圖維首善數十年之陋一朝煥然匪才且賢宜不及此昔
文翁興學蜀化大行范甯崇儒晉業彌顯侯庶幾兩公哉
雖然修飭學宮良有司事至於修飭學術以稱上意則士
之任也史載魯號秉禮之國民有度洙泗者長者將涉少
者扶攜而代其負其後風俗衰薄老少交相讓斷斷如也
吾夫子觀之大懼退而修詩書禮樂以黜相化導卒之歷
六國秦漢之際士風極敝於縱橫掉闔而魯城諸生猶相
與絃歌誦習不輟則夫子轉移之效也諸士子平居固誦
法吾夫子者茲復得賢侯作新輔翼之有不悚然懼幡然
悟者非夫也余願二三子敦實行毋尚浮華崇遜讓勿長

傲情一洗近日之澆風以返國初之樸茂則不負聖祖建
學之盛心卽賢侯惓惓屬望之念有餘休矣若夫攻文墨
取科第致身通顯之途諒諸生優爲之高侯今日作新學
宮之至意當不止此也諸士子勗哉

創置學田記

舉人 知府 衛東楚 邑人

國家定鼎爰立學校羣多士而教之擇多士而養之制誠
善矣然景運旣開人文翕聚食廩者額於數况比年以來
饑饉洊臻百姓猶可自營膠序徃徃稱匱竭吾邑侯高公
下車卽喟然歎曰士無所養難乎其爲業矣亟欲儲田以
養之學田不知其所自始嘗閱兩泐志創於趙宋間白鹿

嶽麓石鼓之制其遺矣吾葉舊無學田遂集膠序中申子
嘉禾王子瀛士牛子孟熙等六人欲創立以貽諸後誠之
曰爲學也毋過腴毋近郭毋比豪強不遠防侵也明年戊
子得地八區計田五百九十畝有奇咸歡然受而平其直
焉仍減田之常額者半而歲供秋夏稅亦如之蓋公之公
也田成約諸生往視莫不欣然往遂懸圖招佃立倉以爲
儲蓄擇收掌明簿籍凡諸生有喪不能葬年長不能娶以
及窶貧衣食不能給者告於學然後牒於縣給之刻石於
堂之右以傳永久合諸生而諭曰待二三年積穀千百石
每月學中先生集多士考試較其優劣卽以穀供廚饌值

并易紙筆之資其或學中必費當用者亦取給焉匪但爲
資貧地也強者不得擅爲已有好者不得盜鬻生則可與
立立則可與成而經文緯武仁耕義耨之才彬彬然出焉
其爲國家儲備用之計遠矣諸生盍感發興起以無負今
日意乎况倉廩實而知禮義夫人之常情也其有不遵是
訓壞吾學田衆生反之不聽者白之官以正其罪其所爲
多士計何無已哉侯名文登字伯昇別號瀛臺浙江平湖
籍嘉興人以隆慶丁卯鄉進士來令吾邑政通人和上下
信孚將來所就其可量乎諸文學以吾言爲然因敘其事
而記之

重修舊縣城隍廟記

邑令 高文登 嘉興人

縣古屬葉至至元間而始廢惟葉隸於宛焉迨我明興莫
之有改然制雖廢其垣池高深遺址猶有存者居民稠密
儼然一巖邑也西北隅舊有城隍廟創始何年邈不可稽
其創而頽頽而復新者亦不知凡幾雖有斷幢一二率荒
鄙剝落泯泯然蔑足以據父老婦孺奔走祠下以虔報賽
吏二百餘禩於茲矣縣當南北孔道余頃因公至此登畫
龍臺眺飛鳧里搜諸梁王喬遺跡而弔古焉徃徃亦經祠
下見其正殿三楹歸然奐然由門以達寢抱以崇垣規模
嚴肅亦足以安威靈矣因詢之左右則曰前此敝烏鼠困

風雨者多歷年所民鄒珮等矢心新之迨珮子東始襄厥績余聞之固多東之用譽而又重有感焉乃集東等而諭之曰稽典禮凡有禱於民者則祀之矧城隍之神禦暴固圍捍外而衛內厥功於民重矣雖新政弗在於斯邑厲弗主於斯朔望弗祇謁於斯其水旱疾疫則致禱春秋祈報則致敬而民崇若祠而祀之誠於禮合矣輸貲以鳩工其視飾梵宮佛宇信不侔也先正有曰神人相依惟正是保又曰神福善而禍淫不知禍福善淫之機相爲感召非神可得私也苟謂福可諂得禍可倖免陰於彼而陽飾此以爲諂倖地余知神必吐之矣茲距葉甫舍許余聞其俗近

益瀛樂訟而尙詭嗜沓欺誕簧鼓是非徃徃有之若然則
奚啻有干法憲諒幽責之莫追也爾輩固罔業是余特爲
懷詔倖而恃茲爲地者念哉此余之重有感也若夫工始
於某成於萬歷十六年戊子春爰命書石以誌歲月焉俾
後之覩廟貌而思修葺者知所興起或誦余言而惕若志
未必無補於世教云爾也 是爲記

重修城隍廟樂樓記

高文登

今上丁亥歲予奉命來宰葉甫下車例至南陽謁太守比
行二十里渡澧水則千室之聚在焉父老逆謂予曰此葉
縣舊城也縣雖北徙而城隍神祠故在予聞之因便謁

則一殿僅存像設其具而門垣廊廡傾頽極矣予四顧躊躇慨然興嗟因謂父老曰茲地城池雖荒涼不可問而神之英靈盼饜洋洋如昔忍坐視其蕪穢不治乎盍相與圖之於是鎮民胡景松張志友出而肩其任焉遠近之人耳其事罔不量力施捨轉木運粟捐貲鳩材乃首事樂樓築臺若干仞廣如之上建層樓三楹凡父老伏臘祈報奏樂者亟就之次修東廊七間西稱是復仿邑中兩廡設諸曹官像如俗所謂地獄果報之事咸備繚以周垣飾以彩繪無汰無嗇而燦然改觀矣工既竣相率請予爲文以紀其事予則以城隍之神不見於前代而我國朝特隆重之守

土者平居朔望拜謁致敬遇有水旱大故則協以山川社稷之靈躬祀禱焉據此則修葺祠宇宜掌於有司而景松等乃能不惜己貲經營趨事不數月而告成功豈非其敬神之念出於由衷而不容已乎昔季路問事鬼神而仲尼告以未能事人焉能事鬼仲尼豈嘗以慢神教天下第幽明一理緩急有辨世人不當躡等以瀆神聽云爾今天下郡縣既有職官握刑政教化之柄而又設城隍神祠以司禍福於冥冥中此聖祖神道設教之意與仲尼同焉景松等果能充此新廟之善念以爲一鎮倡始毋健訟毋營私日取高皇帝制諭六條服膺而敬行之俾人稱曰良民良

民則神明降福若影響隨之矣不然者陽慕施捨之名陰肆剋斂之計輕出不可踰之大閔而妄希不可測之冥福甚非今日修復之本意也爾曹其念之哉予既嘉景松等之善而又驗人心之易於感也因申明茲義以爲葉人告至於布金姓名經費多寡則有司存不具載

復問津書院并建葉公祠記

提學周夢暘 吉水人
副使

余過昆水上蓋有問津書院云考孔子問津之轍在葉縣北十里黃成山下而此地非也因此有清流縈迴茂林蒼翳前汝南參政劉君甚愛之謂可託聖蹟也檄知縣賈君樞建書院其中肖孔子像以祀蓋自嘉靖壬辰迄於今垂

一紀矣殿像垣牆傾圯殆盡祇巋然綽楔跨水之湄余周視之謂縣令高君曰盍復新以爲聖蹟與儒生地乎高君遂議葺治之舊前殿設宣聖主子路與長沮桀溺東西配志蹟所自始也而殿後有子陵祠其來已久高君意謂葉故城別有光武廟子陵宜從之葉公治葉有平亂導利之政孔子所爲教迪者三見魯論中是何可獨遺於是移子陵從光武於故城而改建爲葉公祠傍構講堂號舍延諸弟子之秀者入而肄業工料之具有積羨可取給其所不足令請自任之議上余轉聞當事悉報可而中丞周公謂於君臣師友之義各有當也殿掇舊材十之二講堂四楹

兩翼各一楹東西號舍十有餘間重門曲道外塹周垣無
不宏壯整肅工興於庚寅孟冬落成於辛卯初夏余復過
葉煥然一新以今視昔凡六十年固亦地靈一運會云高
君謂余覩成事不可無記余謂今之有司多視官如傳舍
其劣者實囊橐能者飭廚傳張具無失使者懼三年遷矣
君既已報最猶不愛餘力修舉廢墜爲聖蹟儒生地微獨
可以妥神靈而諸生有不因之奮興者乎高君名文登浙
之平湖人治葉多善政此其一端也是爲記

漢光武廟後改建嚴子陵祠記

周夢暘

葉故昆陽地也漢光武昆陽一戰帝業自此始以故葉至

今廟祀之其故人嚴子陵者僑寓滄水上舊與友善卽不
臣事隱富春以終葉固有子陵之跡矣舊祠子陵於書院
孔殿後非宜也葉令高君方上議欲有所更置而光武廟
後有淫祠距百步而近君易之祠子陵合爲周垣別以丹
堊又立石表其前而題之曰漢光武嚴子陵相會處君臣
相從歲時獻享或謂子陵生不事光武死而臣之非其志
也余以子陵不臣漢者不拜漢之爵秩耳及就而共寢足
加帝腹子陵豈遠光武哉廟成傍各爲房三間以招守者
匠作之費君自給之上不費公帑下不煩民力蓋一舉而
使君臣大義不至顛倒於廟祀也善哉高君名氏與興修

之由略見問津書院記茲不復著

重修黃柏山衍慶庵記

舉人

鄧國勳邑人

教像之顯其昉尚矣自漢明帝建精舍以居摩騰厥後梵宮琳宇殆無紀極考諸載誌凡洞天福地罔不占天下名山大川斯世世與法輪同轉卽以吾邑乘所載觀之凡古刹三十餘或依山而乏水或傍水而無山孰有坐山面水如黃成山衍慶庵者乎山無旁支平地旣起滢水自西來注之澄潭汪濊碧波一瀉襟山前而帶山後高峰遠樹掩映回環景色萬狀誠一方勝覽也庵舊只一楹在山之頂據碣宏治壬戌重修至嘉靖甲辰少司寇潢川衛公始買

是山闢田種樹爲堂於山之麓顏其楹曰樂壽名其亭曰
漁隱以頤老焉長公揚州守少濱始移庵於今趾與里人
王然相地而增修之凡正殿三楹肖菩薩三大士像捲棚
三楹東西殿各三楹位伽藍於東殿廚廂門垣規模宏廓
始名之曰衍慶洎萬曆壬辰之歲凡山田亭榭並衍慶庵
悉爲今榻鄉簿中軒劉氏所有中軒延道流裴靜會日焚
香誦黃老其中閣歲旣久殿宇法像不無圯壞乃與王然
之子行仁募衆而重新之支敝補缺疊隕覆漏塽汚之丹
堊之金碧相輝神人胥悅仍於西殿塑清江聖母祀焉丁
酉冬工竣將礪石以紀歲月而屬記於予予曰神每依人

而顯地每因人而靈茲庵於甲辰之前僻陋於荒岑已耳
甲辰之後雖福界始興不過歲時一遊觀已耳今中軒未
老投閑足跡罕及城市日跨短筇與二三逸士晨詩暮酒
優游於山亭麓樹間山川可謂得良主人哉矧行仁能繼
父志而靜會又能襄厥成謂法輪可同轉者非耶慶斯可
常衍矣抑此庵予舊遊地他日倦遊家食時與主人結鷗
鷺之盟信東坡所謂非生客者也復念樂天之記香山院
曰予安知他劫不與微之結後會緣今觀其文得宿命通
省今日事如智太師記靈山於前會羊叔子識金環於後
身有味乎言之令人俯仰感慨間了然釋矣予願於將來

亦然故捐庵之顛末敘其改革詳其興廢以誌諸永久也
嗣而新者庶幾有考云是爲記

黃山谷祠記

戶部
郎中馬之駿新野人

王蓋伯明府宰葉之二年譽聞流通百度修舉暇日循覽
故乘念宋黃魯直先生曾尉茲土而俎豆之所無專宮爲
慨然者久之乃度地邑東南偏建祠三楹翼以門廡旁爲
室棲埽除者俾鼓鐘香火其中髹堊丹碧整潔輝煌蔚爲
一邑之偉觀而走使屬記於余余考先生初舉進士卽調
尉於葉後舉四京學官以文優教授北京國子監蓋唐宋
以是職爲登第筮仕之階如白傅由蓋屋尉入爲集賢校

理而先生亦以此起漸升史局非若後世奔走蒲伏斥爲卑僚也且一官何足以重先生而先生以茲官實爲地重然不佞嘗慨先生生平不能不爲廢卷三歎矣文士以文章鳴有勃然不可禦之才顯然不可回之氣卽有昭然不可掩之名而庸夫儂子必欲恃其權位撓折之其撓折之法無多端必還卽其言語文字間摭拾諛訛以快其謀迨響銷景沉其所由中爲罪者終必以此伸於天下後世此無他吾氣足以持之耳先生典著作再遷起居舍人秘書丞兼國史編修官珥筆承明司袞鉞予奪之任乃見惡於章蔡之黨至譏以實錄多誣摘條見問如所對鐵龍爪治

河爲兒戲者先生直以官北都時目所親見折之意先生
削牘時政事人才法令舉動觸於睫間腕下欲泣欲憤者
不知幾許亦明知直筆所留犯權奸之所甚護而不遑顧
乃挾虎豹九關之威滅蠱一矢之利詰責竄逐欲使奪所
守以殉吾私嘻亦愚而左於策矣先生至孝天植有韻之
言得法少陵臨池以奇險枯勁自立壇宇當時最爲子瞻
先生所重始以實錄貶繼以承天院記貶用筆舌費禍亦
略與子瞻相同然迄於今章蔡之骨已冷卽其子孫或泚
額不敢道而學者並舉而稱之曰蘇黃簡冊姓名足以光
日星而搖河嶽乃知抑其遇苦其身羣奸所能爲也先生

之手之口與天下後世愛慕先生之手之口羣奸所不能
爲也則何也君子氣陽小人氣陰陰之氣聚而終竭陽之
氣散而常伸也按先生斥逐之迹在涪涪重在黔黔重在
宜宜重矧筮仕之始地如葉其神當有眷顧而憑依者試
令披荒榛履遺址草木若夏而韻山阜若增而高不其宜
哉明府處不諱之朝政事文章皆蹀躞絕軌從四百年後
奮而爲一堂之想章之廟貌俾爲一邑之重易所謂氣相
求者庶幾矣予旣操是說記之仍爲迎神送神之二歌使
歲時用祀饗焉迎神歌孔鸞蘊彩兮輝其枳叢旃檀之處
于林兮逆則從風惟哲人兮黃綬同流香譽兮垂豐功洪

州煙墟兮皖若霜蓬乃左顧兮天之中駕文蚪兮駟奔虹
靈檐留兮居新宮送神歌彼奎宿兮帝傍噓紫氣兮瀉銀
潢惟公奮翼兮相翱翔左挾秦米兮右晁張咄封狐兮尾
臧類完錦兮摘珪璋趾九折兮神彌揚青燈刻刻兮青編
光遺老拜舞兮嗚呼不忘神安遊兮白雲鄉